



## Komunikado di prensa

28 di febrüari 2024

### **Cft tokante di Kòrsou: "Awor ta e momentu pa atendé ku riesgonan presupuestario"**

**Willemstad – Huntu ku Sint Maarten i CBCS, Kòrsou a logra haña un solushon pa e problemátika serka ENNIA. E solushon aki lo akapará un parti konsiderabel di e presupuesto di e pais, sinembargo, Kòrsou ainda tin algun espasio finansiero. Awor ta e momentu pa probechá e espasio aki pa atendé ku e sobrá riesgonan presupuestario, manera e posishon di debe i e défisitnan den kuido i seguridat sosial. Esaki ta loke Kolegio di supervishon finansiero Kòrsou i Sint Maarten (Cft) a enfatisá den kòmbersashonnan resiente ku Gobièrnu di Kòrsou.**

Na final di 2023, huntu ku Sint Maarten i Banko Sentral di Kòrsou i Sint Maarten komo atministradó i supervisor di ENNIA, Kòrsou a yega na un akuerdo tokante di un solushon pa e problemanan serka ENNIA. Komo parti di e solushon aki, Kòrsou ta komprometé su mes na un kontribushon anual di ANG 30 mion entrante 2027, pa un periodo di 30 aña. Apesar di e desaroyo ekonómiko faborabel di Kòrsou, un maneho presupuestario prudente – en parti den e marko di e obligashon aki – ta di sumo importansia.

#### **Riesgonan pa e presupuesto**

Ta asina ku e presupuesto di Kòrsou konosé algun riesgo ku por (sigui) preshoná e presupuesto di e pais. Cft ta seriamente preokupá pa e delikades kontinuo di e situashon finansiero di Curaçao Medical Center (CMC) i a enfatisá ku pa mas tardá na 2024 lo mester bini ku un solushon struktural pa esaki. E situashon di CMC ta un ehèmpel ekselente di e nesesidat mas amplio pa reforma den kuido. Kòrsou ta gasta un parti relativamente grandi di su produkto nashonal bruto na kuido. Si no implementá e reformanan nesesario, kontribushonnan adishonal for di e presupuesto di e pais ta inevitabel. Ademas, Cft te ainda ta preokupá pa e ingresonan ku ainda ta inseguro prosedente di e *fee* di lisensia pa oferentenan di wega di plaka. Ta importante pa mitigá e riesgonan aki mas pronto posibel. Awor ku a yega na un solushon pa ENNIA, Kòrsou a bolbe drenta den negosiashon tokante di e tasa di interes di e fianza pa sosten di likides refinansiá di ANG 911 mion. Si Hulanda efektivamente baha e interes riba e fianza aki, lo ta bon pa Kòrsou no usa e espasio finansiero aki mésora inkrementando otro gastunan, si no utilizá esaki pa pago di debe i invershonnan.

Cft tambe a enfatisá tambe e importansia di invershonnan i reformanan duradero. Banda di un maneho presupuestario prudente, invershonnan i reformanan ta e pilarnan riba kua Kòrsou por realisá un kresementu ekonómiko duradero i garantisá viabilidad di pago di su debenan.

Pa 2024, Kòrsou ta presupuestá ANG 133 mion na invershonnan nobo, parsialmente finansiá mediante fiansan nobo. Sinembargo, e kapasidat di implementashon te ainda ta limitá. Na 2023, Kòrsou a realisá aproksimadamente mitar di e invershonnan proyektá. P'esei, Cft a urgi Kòrsou pa duna mas informashon tokante di e planifikashon di likides di e pais, pa asina rekonsiliá e invershonnan ku e normalisashon di e posishon di debe oumentá. Den e konteksto aki, tambe ta di importansia pa identifiká debidamente e riesgonan presupuestario.

Cft ta konsehá Kòrsou pa keda aktuá di manera desisivo i pa mitigá diligentemente tur riesgo pa e presupuesto.

[Fin di komunikado di prensa]



**Potrèt:**

Nathan Roosberg

**Deskripsjon di potrèt:**

Invershonnan i reformanan, huntu ku un maneho presupuestario prudente, ta e pilarnan riba kua Kòrsou por realisá un kresementu ekonómiko duradero i garantisá e viabilidad di e pago di su debenan

**Nota pa e redakshon - no publiká**

Persona di kontakto di Cft:

Sekretariado di Kolegionan di supervishon finansiero  
Telefòn +5999 461-9081 / +5999 461-9082 / +5999 461-9084  
Koreo elektróniko info@cft.cw  
Wèpsait www.cft.cw

**Kontaktonan di prensa:**

Jefka Alberto  
Telefòn +5999 512-6861